

## МОНГОЛ УЛСЫН ХУУЛЬ

2018 оны ... дугаар  
сарын .... –ны өдөр

Улаанбаатар  
хот

### ХЯЛБАРШУУЛСАН ТАТВАРЫН ТУХАЙ

#### НЭГДҮГЭЭР БҮЛЭГ

##### Ерөнхий зүйл

#### 1 дүгээр зүйл.Хуулийн зорилт

1.1.Энэ хуулийн зорилт нь хялбаршуулсан татварыг тооцох, төлөхтэй холбоотой харилцааг зохицуулах болон тус татварт хамрагдах татвар төлөгчийн хүрээг тодорхойлох, хялбаршуулсан татварын хувь хэмжээг тогтоох болон уг татварыг төсөвт төлөх, тайлагнахтай холбогдсон харилцааг зохицуулахад оршино.

#### 2 дугаар зүйл.Хялбаршуулсан татварын хууль тогтоомж

2.1.Хялбаршуулсан татварын тухай хууль тогтоомж нь Монгол Улсын Үндсэн хууль, Татварын ерөнхий хууль, энэ хууль болон эдгээртэй нийцүүлэн гаргасан хууль тогтоомжийн бусад актаас бүрдэнэ.

2.2.Энэ хуульд заасны дагуу татвараа төлж, тайлагнах харилцааг хялбаршуулсан татварын горим гэнэ.

2.3.Энэ хуульд заасны дагуу ногдуулж, төлөх татвар (цаашид “хялбаршуулсан татвар” гэх) нь татвар төлөгчийн холбогдох хууль тогтоомжийн дагуу төлбөл зохих орлогын албан татвар (аж ахуйн нэгжийн орлогын албан татвар болон хувь хүний орлогын албан татвар) болон нэмэгдсэн өртгийн албан татвар (НӨАТ)-ыг орлох, эдгээрийг нийлүүлж тодорхойлсон нэгдсэн татвар байна.

2.4.Хялбаршуулсан татварын горимд шилжсэн аж ахуйн нэгж, байгууллага нь Аж ахуйн нэгж, байгууллагын орлогын албан татварын тухай хуульд заасны дагуу төлбөл зохих аж ахуйн нэгжийн орлогын татвар болон Нэмэгдсэн өртгийн албан татварын тухай хуульд заасны дагуу төлбөл зохих НӨАТ-ыг орлуулж, энэ хуульд заасны дагуу хялбаршуулсан татварыг төлж, тайлагнана.

2.5.Хялбаршуулсан татварын горимд шилжсэн хувь хүн нь Хувь хүний орлогын албан татварын тухай хуулийн 8.1.3-д заасан үйл ажиллагааны орлогод ногдох хувь хүний орлогын албан татвар болон Нэмэгдсэн өртгийн албан татварын тухай хуульд заасны дагуу төлбөл зохих НӨАТ-ыг орлуулж, энэ хуульд заасны дагуу хялбаршуулсан татварыг төлж, тайлагнана.

2.6.Аж ахуйн нэгжийн орлогын албан татварын хууль, Хувь хүний орлогын албан татварын хууль болон Нэмэгдсэн өртгийн албан татварын хуульд заасны дагуу холбогдох татвараа төлж, тайлагнах харилцаа (цаашид “татварын ердийн горим” гэх)-ны оронд энэ хуульд заасны дагуу хялбаршуулсан татварын горимд шилжих, эсхүл

буцаад татварын ердийн горимд шилжих эсэх нь татвар төлөгчийн сонголт байх бөгөөд сайн дурын үндсэн дээр хийгдэнэ.

2.7.Хялбаршуулсан татварын горимд шилжсэн татвар төлөгчийн хувьд Аж ахуйн нэгжийн орлогын албан татварын тухай хууль, Хувь хүний орлогын албан татварын тухай хууль болон Нэмэгдсэн өртгийн албан татварын тухай хуульд заасан хөнгөлөлт, чөлөөлөлтөд хамрагдах эрх эдлэхгүй болно.

### **3 дугаар зүйл.Хялбаршуулсан татвар төлөгч**

3.1.Холбогдох хуульд заасны дагуу харьяалагдах татварын албандаа татвар төлөгчөөр бүртгүүлсэн, энэ хуулийн 3.2-д заасан шаардлагыг хангасан, харин энэ хуулийн 3.4-д заасан тохиолдолд хамаарахгүй байх аж ахуйн нэгж, байгууллага, хувь хүн нь хялбаршуулсан татварын горимд шилжих хүсэлтээ энэ хуулийн 4 дүгээр зүйлд заасны дагуу гаргаж, баталгаажуулснаар хялбаршуулсан татвар төлөгч болно.

3.2.Үйл ажиллагаа явуулж байгаа бол тайлант жилийн өмнөх жилийн борлуулалтын орлогын дүн нь, үйл ажиллагаа шинээр эрхлэх гэж буй бол төсөөлж буй жилийн борлуулалтын орлогын дүн нь 1,5 тэрбум төгрөгөөс ихгүй байх аж ахуйн нэгж, байгууллага, хувь хүн нь хялбаршуулсан татвар төлөгч болж болох бөгөөд тэдгээрийг дараах бүлэгт ангилна:

- 3.2.1. Бүлэг 1 – Импортоор бараа оруулж ирэн, худалдан борлуулагч
- 3.2.2. Бүлэг 2 – Жижиг дэлгүүр, мухлаг, ТҮЦ, лангуугаар худалдаа эрхлэгч
- 3.2.3. Бүлэг 3 – Зочид буудал, нийтийн хоолны үйлчилгээ эрхлэгч
- 3.2.4. Бүлэг 4 – Тээврийн үйлчилгээ эрхлэгч
- 3.2.5. Бүлэг 5 – ХАА-н салбарт үйлдвэрлэл, үйлчилгээ эрхлэгч
- 3.2.6. Бүлэг 6 – Барилгын салбарт үйлдвэрлэл, үйлчилгээ эрхлэгч
- 3.2.7. Бүлэг 7 – Нийтийн аж ахуйн салбарт үйлдвэрлэл, үйлчилгээ эрхлэгч
- 3.2.8. Бүлэг 8 – Бусад жижиг, дунд үйлдвэр эрхлэгч

3.3.Хялбаршуулсан татвар төлөгч нь худалдан борлуулсан бараа, ажил үйлчилгээний гүйлгээнд кассын машин, хэвлэх төхөөрөмж, пос терминал машин болон түүнтэй адилтгах техник хэрэгслийг заавал хэрэглэнэ.

3.4.Дараах татвар төлөгчдийн хувьд хялбаршуулсан татварын горимд шилжих эрхгүй байна:

- 3.4.1. Онцгой албан татвар ногдох бараа импортлогч, үйлдвэрлэгч нар;
- 3.4.2. Хугацаандаа төлөөгүй татварын өр төлбөр нь 1 сая төгрөгөөс их байх;
- 3.4.3. Зээл, даатгал, хөрөнгө оруулалтын сангийн үйл ажиллагаа эрхлэгч, үнэт цаасны зах зээл дээр үйл ажиллагаа эрхлэгч, төлбөрт таавар, бооцоот тоглоом, хонжворт сугалаа зохион байгуулах үйл ажиллагаа эрхлэгч, аудит болон бүхий л төрлийн зөвлөх үйлчилгээ эрхлэгч;
- 3.4.4. Аль нэг компанийн охин болон харилцан хамааралтай компани байвал;

#### **4 дүгээр зүйл.Хялбаршуулсан татвар төлөгчөөр бүртгүүлэх**

4.1.Энэ хуулийн 3 дугаар зүйлд заасан шаардлагыг хангасан татвар төлөгч нь өөрөө хүсвэл хялбаршуулсан татварын горимд шилжих хүсэлтээ харьяалагдах татварын албанд ирүүлнэ.

4.2.Хялбаршуулсан татварын горимд хамрагдах хүсэлтийг тухайн жилийн 1 дүгээр сарын 01-ний өдрөөс 25-ны өдрийг дуустал хугацаанд хүлээн авч, шийдвэрлэнэ.

4.3.Энэ хуулийн 3.2.2, 3.2.3-д заасан татвар төлөгчийн хувьд энэ зүйлийн 4.2-д заасан цаг хугацаа хамаарахгүй бөгөөд улирал бүрийн эхний сарын 1-ний өдрөөс 25-ны өдрийг дуустал хугацаанд багтан хүсэлтээ ирүүлж болно.

4.4.Хялбаршуулсан татварын горимыг хэрэглэж буй татвар төлөгч нь жил бүр горимоо баталгаажуулах бөгөөд баталгаажуулах хүсэлтээ тухайн тайлант жилийн дараа жилийн 2 дугаар сарын 25-ны өдрийг дуустал хугацаанд багтаан харьяалагдах татварын албанд ирүүлнэ.

4.5.Хялбаршуулсан татварын горимд шилжихээр болон баталгаажуулахаар татвар төлөгчөөс ирүүлсэн хүсэлтийг татварын алба ажлын 1-3 хоногийн дотор хянан үзэж, баталгаажуулснаар хялбаршуулсан татвар төлөгчийн горимд шилжсэн гэж үзнэ.

4.6. Хялбаршуулсан татварын горимд шилжих болон баталгаажуулах хүсэлт гаргах, хүсэлтийг хянан шийдвэрлэх, баталгаажуулахтай холбоотой үйл ажиллагааг санхүү, төсвийн асуудал эрхэлсэн төрийн захиргааны төв байгууллагаас батлах журамд нийцүүлэн хэрэгжүүлнэ.

#### **5 дугаар зүйл.Хялбаршуулсан татварын горимыг хүчингүй болгох**

5.1.Дараах тохиолдолд хялбаршуулсан татварын горимыг цуцалж, хүчингүй болгоно:

5.1.1.Хялбаршуулсан татварын горимоос гарч, татварын ердийн горимд шилжих хүсэлтээ ирүүлсэн;

5.1.2.Хялбаршуулсан татварын горимыг үргэлжлүүлэх хүсэлтээ энэ хуулийн 4.4-д заасны дагуу ирүүлээгүй, баталгаажуулаагүй;

5.1.3.Энэ хуулийн 3.3-д заасан хүлээсэн үүргээ биелүүлээгүй зөрчлийг нэгээс илүү удаа гаргасан;

5.1.4.Татварын урьдчилгаа сарын төлбөрийг энэ хуулийн 10.1.2, 10.1.2-д заасан хугацаанд төлөөгүй зөрчил гаргасан;

5.1.5.Татварын тайланг энэ хуулийн 11.1, 11.2-д заасан хугацаанд ирүүлээгүй зөрчил гаргасан;

5.1.6.Энэ хуулийн 3.4.1, 3.4.4-д заасан үйл ажиллагаа эрхлэх болсон;

5.1.7.Аль нэг компанийн охин болон харилцан хамааралтай компани болсон;

5.2.Энэ хуулийн 5.1-д заасан нөхцөл байдал үүсвэл, үүссэн улирлын дараа улирлын эхний сарын 1-ний өдрөөс эхлэн хялбаршуулсан татварын горимыг цуцалж, хүчингүй болгоно.

5.3.Хялбаршуулсан горимыг цуцлах нөхцөл байдлыг тогтоох, цуцлах, татвар төлөгчид мэдэгдэх үйл ажиллагааг санхүү, төсвийн асуудал эрхэлсэн төрийн захиргааны төв байгууллагаас баталсан журамд нийцүүлэн хэрэгжүүлнэ.

## **ХОЁРДУГААР БҮЛЭГ**

### **Татвар ногдуулах**

#### **6 дугаар зүйл.Татвар ногдуулах орлого**

6.1.Хялбаршуулсан татварын горим дах татвар ногдуулах орлого нь татвар төлөгчийн тухайн тайлант татварын жилд борлуулсан бараа, үзүүлсэн ажил үйлчилгээний борлуулалтын нийт орлого байна. Борлуулалтын орлогын дүнд үндсэн хөрөнгө борлуулсны орлого орж тооцогдохгүй.

6.2.Хялбаршуулсан татвар төлөгч нь орлогын албан татвар болон НӨАТ-ыг нэгдсэн байдлаар төлж байгаа хэдий ч эдгээр татварын бүртгэлийг холбогдох хууль тогтоомжийн дагуу тус тусад нь хөтөлнө.

#### **7 дугаар зүйл.Татварын хувь, хэмжээ**

7.1.Хялбаршуулсан татвар төлөгчийн татвар ногдуулах орлогод дараах хувь хэмжээгээр татвар ногдуулна:

- 7.1.1. Бүлэг 1-д хамаарах татвар төлөгчдийн хувьд – 1%
- 7.1.2. Бүлэг 2-д хамаарах татвар төлөгчдийн хувьд – 2%
- 7.1.3. Бүлэг 3-д хамаарах татвар төлөгчдийн хувьд – 3,5%
- 7.1.4. Бүлэг 4-д хамаарах татвар төлөгчдийн хувьд – 3%
- 7.1.5. Бүлэг 5-д хамаарах татвар төлөгчдийн хувьд – 1%
- 7.1.6. Бүлэг 6-д хамаарах татвар төлөгчдийн хувьд – 3%
- 7.1.7. Бүлэг 7-д хамаарах татвар төлөгчдийн хувьд - 2%
- 7.1.8. Бүлэг 8-д хамаарах татвар төлөгчдийн хувьд – 2%

7.2.Татвар төлөгчийн ногдуулж, төлсөн хялбаршуулсан татварын дүнгийн 60 хувь нь НӨАТ төлсөнд тооцогдоно.

#### **8 дугаар зүйл. Хялбаршуулсан татварыг бууруулах хувь, хэмжээ**

8.1.Энэ хуулийн 7 дугаар зүйлд заасны дагуу ногдуулсан татварын дүнг татвар төлөгчийн үйл ажиллагаан дах цалин хөлсний зардал болон үндсэн хөрөнгө худалдан авсан зардлаас бусад өртөг, үйл ажиллагааны зардал, төлсөн татварууд (цаашид “зардал” гэх) - ын дүнгийн дараах хувь хэмжээгээр тооцож гарсан дүнгээр бууруулна:

- 8.1.1. Бүлэг 1-д хамаарах татвар төлөгчдийн хувьд – 0,6%
- 8.1.2. Бүлэг 2-д хамаарах татвар төлөгчдийн хувьд – 1%
- 8.1.3. Бүлэг 3-д хамаарах татвар төлөгчдийн хувьд – 2,5%
- 8.1.4. Бүлэг 4-д хамаарах татвар төлөгчдийн хувьд – 2,5%
- 8.1.5. Бүлэг 5-д хамаарах татвар төлөгчдийн хувьд – 0,5%

8.1.6. Бүлэг 6-д хамаарах татвар төлөгчдийн хувьд – 2%

8.1.7. Бүлэг 7-д хамаарах татвар төлөгчдийн хувьд - 1,5%

8.1.8. Бүлэг 8-д хамаарах татвар төлөгчдийн хувьд – 1,5%

## **ГУРАВДУГААР БҮЛЭГ**

### **Татвар тайлагнах, төлөх болон түүнтэй холбоотой бусад харилцаа**

#### **9 дүгээр зүйл. Орлого, зардлыг хүлээн зөвшөөрөх нягтлан бодох бүртгэлийн арга**

9.1.Татвар ногдуулах орлого болон ногдсон татварыг бууруулах зардлын дүнг тодорхойлохдоо нягтлан бодох бүртгэлийн мөнгөн суурь (мөнгө хүлээн авсан буюу төлсөн үед орлого болон зардлыг хүлээн зөвшөөрч бүртгэх арга)-ийг баримтлана.

#### **10 дүгээр зүйл.Татвар төлөх**

10.1. Хялбаршуулсан татвар төлөгч нь энэ хуулийн 3.2-д заасан бүлэгт хамаарсан байдлаасаа шалтгаалан дараах байдлаар татвараа төсөвт урьдчилан төлнө:

10.1.1. Бүлэг 1-д хамаарах татвар төлөгч нь бараа импортоор оруулж ирэх үедээ барааны Гаалийн тариф, гаалийн татварын тухай хуульд заасны дагуу тодорхойлсон гаалийн үнэ дээр гаалийн албан татвар болон тээврийн зардлыг нэмсэн үнэлгээнээс 0,5 хувиар тооцож, гаалийн байгууллагад тухай бүр суутгуулан төлнө.

10.1.2. Бусад бүлэгт хамаарах татвар төлөгч нь тухайн тайлант жилийн өмнөх жилд ногдуулсан татварын дүнг 12-д хуваасан хэмжээгээр сар бүрийн 25-ны дотор төсөвт шилжүүлж төлнө. Татвар төлөгч нь шинээр үйл ажиллагаа эрхлэх гэж буй болон хялбаршуулсан татварын горимд шинээр шилжиж буй бол тухайн тайлант жилийнхээ борлуулалтын орлогыг төсөөлсөн дүнд ногдох татварыг тооцоолон гаргаж, нэг сард ногдох татварыг тодорхойлсон хэмжээгээр сар бүрийн 25-ны дотор төсөвт шилжүүлж төлнө.

10.2. Хялбаршуулсан татвар төлөгчийн энэ зүйлийн 10.1-д заасны дагуу тогтоосон урьдчилгаа татварын сарын төлбөрийн хуваарь нь түүний хялбаршуулсан татварын горимын салшгүй нэг хэсэг бөгөөд уг хуваарийг энэ хуулийн 4.5-д заасны дагуу хялбаршуулсан татварын горимыг баталгаажуулах үед үйлдэн, татвар төлөгчид мэдэгдэн үүрэгжүүлсэн байна.

10.3. Хялбаршуулсан татвар төлөгч нь энэ хуулийн 10.2-д заасан урьдчилгаа татварын сарын төлбөрийн хуваарийг зөрчвөл энэ хуулийн 5 дугаар зүйлд заасны дагуу хялбаршуулсан татварын горимыг цуцалж, хүчингүй болгоно.

10.4. Хялбаршуулсан татвар төлөгч нь энэ зүйлийн 10.1-д заасны дагуу урьдчилан төлсөн татварынхаа илүү, дутуугийн тооцоог энэ хуулийн 11 дүгээр зүйлд заасан татварын ногдуулалт, тайлагналын үйл ажиллагааны хүрээнд хийнэ.

10.5. Хялбаршуулсан татвар төлөгчийн төсөвт урьдчилан төлсөн татварын хэмжээ нь түүний татварын тайлангаар тодорхойлогдсон төлбөл зохих татварын дүнгээс дутуу

байвал дутуу төлбөрийг тайлант хугацааны дараа сарын 25-ны дотор багтаан төсөвт төлнө.

10.6. Хялбаршуулсан татвар төлөгчийн төсөвт урьдчилан төлсөн татварын хэмжээ нь түүний татварын тайлангаар тодорхойлогдсон төлбөл зохих татварын дүнгээс илүү байвал илүү төлсөн төлбөрийг энэ хуулийн 10.1-д заасны дагуу төлөх дараагийн саруудын урьдчилгаа төлбөрийн дүнгээс суутган тооцно.

### **11 дугаар зүйл. Татвараа ногдуулж, тайлагнах**

11.1. Хялбаршуулсан татвар төлөгч нь жилдээ нэг удаа заавал татвараа ногдуулж, тайлагнах ба өөрөө хүсвэл улирал бүр татвараа ногдуулж, тайлагнаж болно.

11.2. Хялбаршуулсан татвар төлөгч нь тайлант жилийн үйл ажиллагааны татвар ногдох орлого, зардлыг энэ хуулийн 6 дугаар зүйл болон 8 дугаар зүйлд заасны дагуу тодорхойлсон болон энэ хуулийн 7.1-д заасан хувь хэмжээгээр татвар ногдуулан тооцсон татварын тайланг гаргаж, тухайн тайлант жилийн дараа жилийн 1 дүгээр сарын 20-ны өдрийн дотор харьяалагдах татварын албанд ирүүлнэ.

11.3. Хялбаршуулсан татвар төлөгч нь татварын тайлангаа улирлаар гаргаж ирүүлэхээр бол тухайн тайлант улирлын дараа улирлын эхний сарын 20-ны өдрийн дотор харьяалагдах татварын албанд ирүүлнэ.

11.4. Хялбаршуулсан татварын тайлангийн маягтыг баталж, мөрдүүлэх болон татвар ногдуулах, тайлагнах, баталгаажуулах үйл ажиллагааг санхүү, төсвийн асуудал эрхэлсэн төрийн захиргааны төв байгууллагаас баталсан журамд нийцүүлэн хэрэгжүүлнэ.

### **12 дугаар зүйл. Хялбаршуулсан татвар төлөгчийн төлбөл зохих бусад татвар**

12.1. Хялбаршуулсан татвар төлөгч нь үл хөдлөх эд хөрөнгийн татвар, хувь хүнд олгосон цалин, хөлс, адилтгах бусад орлогоос суутган төлөх татвар болон бусад суутган тооцох татвар, импортын барааны гааль, импортын барааны НӨАТ гэх мэт холбогдох хууль тогтоомжийн дагуу төлбөл зохих бусад татваруудаа төлөх үүргээс чөлөөлөгдөхгүй.

12.2. Хялбаршуулсан татвар төлөгчийн бэлтгэн нийлүүлэгчдэд төлсөн НӨАТ болон бараагаа импортлох үед гааль дээр төлсөн НӨАТ нь түүний худалдан авсан бараа, үйлчилгээний өртөгт орж тооцогдоно.

### **13 дугаар зүйл. Хялбаршуулсан татвар төлөгчийн үйлдвэл зохих бичиг баримтууд**

13.1. Хялбаршуулсан татвар төлөгч нь бараа борлуулж, ажил үйлчилгээ үзүүлж буй этгээддээ холбогдох хууль тогтоомжид заасны дагуу НӨАТ-ын падаан, зарлагын падаан зэрэг төлбөр, тооцооны бичиг баримтыг үйлдэн өгөх үүрэгтэй.

13.2. Хялбаршуулсан татвар төлөгч нь төлбөр, тооцооны бичиг баримтад НӨАТ-ын хуулийн дагуу ногдуулсан НӨАТ-ын дүн, хувь хэмжээг тэмдэглэх ба ингэж бичсэн нь НӨАТ-ын өглөгийн дансны бичилт болж нягтлан бодох бүртгэлд тусгагдахгүй.

## **ДӨРӨВДҮГЭЭР БҮЛЭГ**

### **Хялбаршуулсан татварын горимд шилжих болон татварын ердийн горимд буцаж шилжих үеийн зарим зохицуулалт**

#### **14 дүгээр зүйл. Татварын ердийн горимоос хялбаршуулсан татварын горимд шилжих үеийн зарим зохицуулалт**

14.1. Хялбаршуулсан татварын горимд шилжих үед татвар төлөгч нь горимд шилжихийн өмнөх үйл ажиллагааны борлуулалтын хүрээнд үүссэн НӨАТ-ын төлбөрийн дутуу үлдэгдлийг бараа, бүтээгдэхүүний өртөгт шилжүүлэн шингээнэ.

14.2. Хялбаршуулсан татварын горимд шилжсэн татвар төлөгч нь орлого, зарлагын бүртгэл болон анхан шатны бүртгэл, нягтлан бодох бүртгэл хөтөлж, санхүүгийн тайлан тэнцэл гаргах талаар холбогдох хууль тогтоомжид заасан үүрэг, хариуцлагаас чөлөөлөгдөхгүй.

#### **15 дугаар зүйл. Хялбаршуулсан татварын горимоос татварын ердийн горимд буцаж шилжих үеийн зарим зохицуулалт**

15.1. Хялбаршуулсан татварын горимд байх үедээ худалдан авсан бараа, ажил үйлчилгээндээ бэлтгэн нийлүүлэгчдэд төлсөн НӨАТ нь татварын ердийн горимд шилжсэнээс хойш борлуулсан бараа, ажил үйлчилгээнд ногдуулсан НӨАТ-аас хасч тооцогдохгүй.

15.2. Хялбаршуулсан татварын горимоос татварын ердийн горимд шилжих үед түүний хялбаршуулсан горимд байхдаа төлсөн татварын дүнгээс энэ хуулийн 7.2-д заасан хувь хэмжээгээр тооцож, аж ахуйн нэгжийн орлогын албан татвар буюу хувь хүний орлогын албан татварын төлөлтөд шилжүүлэн тооцно.

15.3. Энэ хуулийн 5.2-д заасны дагуу хялбаршуулсан татварын горимыг цуцалж, хүчингүй болгосон өдрөөс хойшхи татварын тайлант жилийн үлдсэн хугацаанд татвар төлөгч нь татварын ердийн горимын дагуу аж ахуйн нэгжийн орлогын албан татвар, хувь хүний орлогын албан татвар болон НӨАТ-ыг холбогдох хууль тогтоомжид заасны дагуу төлж, тайлагнана.

15.4. Татварын ердийн горимд шилжсэн хялбаршуулсан татвар төлөгч нь өмнөх тайлант жилд гарсан үйл ажиллагааны алдагдлаа албан татвар ногдуулах орлогоос хасуулж тооцож болох ба түүнээс өмнөх жилүүдэд гарсан алдагдлуудыг тооцож хасахгүй.

15.5. Хялбаршуулсан татварын горимоос татварын ердийн горимд шилжих үед шилжин ирсэн орлогын дүнгээс түүний хялбаршуулсан татварын горимын үед гарсан үйл ажиллагааны зардлыг хасч тооцохгүй ба энэ хуулийн 8.1-д заасны дагуу хялбаршуулсан татварын хэмжээг бууруулсан зардал ч мөн адилхан хасч тооцогдохгүй.

## **ТАВДУГААР БҮЛЭГ**

### **Хууль зөрчигчид хүлээлгэх хариуцлага**

#### **16 дугаар зүйл. Хууль зөрчигчид хүлээлгэх хариуцлага**

16.1. Энэ хуулийг зөрчсөн албан тушаалтны үйлдэл нь гэмт хэргийн шинжгүй бол Татварын ерөнхий хууль болон Төрийн албаны тухай хуульд заасан хариуцлага тус тус хүлээлгэнэ.

16.2. Энэ хуулийг зөрчсөн хүн, хуулийн этгээдэд энэ хуульд өөрөөр заагаагүй бол Эрүүгийн хууль, эсхүл Зөрчлийн тухай хуульд заасан хариуцлага хүлээлгэнэ.

16.3. Энэ хуулийн 4.1, 4.4-д заасны дагуу хялбаршуулсан татварын горимд шилжихээр болон баталгаажуулахаар ирүүлсэн хүсэлт дах мэдээллийг буруу мэдээлсэн бол:

16.3.1. Борлуулалтын орлогын хэмжээг энэ хуулийн 3.2-д заасан хэмжээнээс бууруулж буруу мэдүүлсэн бол бууруулж мэдүүлсэн дүнгийн 20 хувьтай тэнцэх дүнгээр торгууль төлнө.

16.3.2. Энэ хуулийн 3.4.1, 3.4.3 дах хэсэгт заасан үйл ажиллагаа эрхэлдэг болон 3.4.4 дах хэсэгт заасан харилцан хамаарлаа буруу мэдүүлсэн бол 100 сая төгрөгтэй тэнцэх хэмжээний төгрөгөөр торгоно.

## **ЗУРГААДУГААР БҮЛЭГ**

### **Хууль хэрэгжүүлэх**

#### **17 дугаар зүйл. Журам, аргачлал баталж, мөрдүүлэх**

Энэ хуульд заасан журам, аргачлалыг санхүү, төсвийн асуудал эрхэлсэн Засгийн газрын гишүүн баталж, мөрдүүлнэ.

## **ДОЛООДУГААР БҮЛЭГ**

### **Хялбаршуулсан татварын горимд шилжих шилжилтийн зохицуулалт**

#### **18 дугаар зүйл. Хялбаршуулсан татварын горимд шилжих завсарын үеийн зохицуулалт**

18.1. Хялбаршуулсан татварын горимд 2018 оны гуравдугаар улиралд шилжих хүсэлтээ гаргасан татвар төлөгчийн хувьд дараах зүйлсийг хүлээн зөвшөөрнө:

18.1.1. 2018 оны 9 дүгээр сарын 1-ний өдрөөс 25-ний өдрийг дуустал хугацаанд харьяалагдах татварын албанд хялбаршуулсан татварын горимд шилжих хүсэлтээ ирүүлэн, баталгаажуулсны үндсэн дээр 2018 оны 10 дугаар сарын 1-ний өдрөөс хялбаршуулсан татвар төлөгч болох;

18.1.2. Хялбаршуулсан татварын горимд шилжих хүсэлтэй татвар төлөгчийн 2018 оны эхний хагас жилд олсон борлуулалтын орлогын хэмжээ 800 сая төгрөгөөс илүүгүй бол энэ хуулийн 3.2 дах хэсэгт заасан шаардлагыг хангасан гэж үзэх;

18.1.3. Энэ хуулийн 3.4.2д заасан шаардлагыг хангасан эсэхийг харгалзан үзэхгүй;



## **НАЙМДУГААР БҮЛЭГ**

### **Бусад**

#### **19 дүгээр зүйл.Хууль хүчин төгөлдөр болох**

19.1. Энэ хуулийг 2018 оны 10 дугаар сарын 1-ний өдрөөс эхлэн дагаж мөрдөнө.

### **ГАРЫН ҮСЭГ**